



REPUBLIKA E SHQIPËRISË
PROKURORIA E PËRGJITHSHME
PROKURORI I PËRGJITHSHËM

Nr. 3173 prot.

5 e 19'

Tiranë më, 20.07.2020

UDHËZIM I PËRGJITHSHËM

Nr. 12, datë 20.07.2020

MBI RREGULLIMIN E MARRËDHËNIEVE MES PROKURORËVE DHE DREJTUESVE TË PROKURORISË, INFORMIMIN, TRANSPARENCËN DHE GARANTIMIN E PAVARËSISË, NË PROKURORITË ME JURIDIKSION TË PËRGJITHSHËM

Në mbështetje, të neneve 148, 148/b shkronja "b", "d", "dh" të Kushtetutës së Republikës së Shqipërisë, të neneve 38 pikat 1 e 2 shkronjat "b", "d" e "f", 2 shkronjat "b" e "c", 4, 5, 6, 42 shkronja "a", "c" "g", 43, 46, 47, 48, 50 e vijues të ligjit nr. 97/2016, "Për organizimin dhe funksionimin e prokurorisë në Republikën e Shqipërisë", të neneve 24, 25 pika 2 e vijues Kodit të Procedurës Penale, të nenit 52 e vijues të ligjit nr.96/2016 "Për statusin e gjyqtarëve dhe prokurorëve në Republikën e Shqipërisë", të nenit 159 e vijues i ligji nr.115/2016 "Mbi organet e qeverisjes të sistemit të drejtësisë", të nenit 132 e vijues të Kodit të Procedurës Administrative të Republikës së Shqipërisë,

U D H Ë Z O J:

**KREU I
DISPOZITA TË PËRGJITHSHME**

**Neni 1
Qëllimi**

1. Qëllimi i këtij udhëzimi të përgjithshëm është për të unifikuar, të drejtat dhe detyrimet e prokurorit në ushtrimin e funksioneve, marrëdhëniet e tij me drejtuesit e prokurorive si prokurorë më të lartë dhe informimin e koordinimin në veprimtarinë e prokurorisë, për të siguruar pavarësinë dhe autonominë e prokurorit në ushtrimin e funksioneve dhe mbarëvajtjen, mbikëqyrjen, eficientë, ligjshmërinë dhe transparencën në veprimtarinë e prokurorisë si organ kushtetues i pavarur.

2. Ky udhëzim ka për qëllim, gjithashtu, për të qartësuar kuptimin dhe zbatimin në praktikë të disa çështjeve ligjore që lidhen me respektimin e parimeve të ligjshmërisë¹, detyrueshmërisë së ndjekjes penale² dhe pavarësisë³ në marrëdhëniet ndërmjet prokurorit me drejtuesit e prokurorive në të gjithë nivelet me juridiksion të përgjithshëm, në përjasje me standardet dhe praktikatat e mira evropiane për unifikimin dhe përmirësimin e veprimtarisë organizative dhe funksionale apo procedurale në prokurori.

Neni 2 Objekti

1. Objekt i këtij udhëzimi të përgjithshëm janë:

a) Garantimi i pavarësisë dhe autonomisë së prokurorit në ushtrimin e funksioneve procedurale në kryerjen e hetimeve, përfaqësimin e akuzës dhe/ose çështjes në gjyq dhe urdhërimin ose mbikëqyrjen e ekzekutimit të vendimeve gjyqësore penale në raport me detyrueshmërinë e ndjekjes penale dhe zbatimin e ligjshmërisë në veprimtarinë e prokurorisë.

b) Përcaktimi i raporteve apo marrëdhënieve administrative dhe funksionale ose procedurale penale, ndërmjet:

i) prokurorit me drejtuesin e seksionit, zëvendësdrejtuesin dhe drejtuesin e prokurorisë pranë gjykatës së shkallës së parë për prokurorët që ushtrojnë funksionet pranë saj.

ii) prokurorit të apelit me drejtuesin e prokurorisë pranë gjykatës së apelit për prokurorët që ushtrojnë funksionet pranë saj.

iii) prokurorëve të Prokurorisë së Përgjithshme, prokurorëve e drejtuesve të prokurorive pranë gjykatave të apelit dhe pranë gjykatave të shkallës së parë me Prokurorin e Përgjithshëm.

c) Mënyrat e informimit në të gjitha hallkat dhe nivelet e prokurorive të juridiksionit të përgjithshëm, duke garantuar mbrojtjen e të dhënave personale, ndalimin e publikimit të akteve dhe ruajtjen e sekretit të hetimeve.

Neni 3 Përkufizime

Në këtë udhëzim, termat apo emërtimet kanë kuptimet si më poshtë:

¹ Shih, nenin 4 “Ligjshmëria e veprimtarisë” të ligjit nr.97/2016“Për organizimin dhe funksionimin e prokurorisë në Republikën e Shqipërisë”, që parashikon:

“1. Prokurorët në ushtrimin e detyrës u nënshtrohen Kushtetutës, marrëveshjeve ndërkombëtare të ratifikuara nga Republika e Shqipërisë dhe ligjeve të tjera në fuqi.

2. Prokurorët i ushtrojnë kompetencat e tyre duke respektuar parimet e procedimit të drejtë, të barabartë e të rregullt ligjor dhe mbrojtjes së të drejtave dhe lirive themelore të njeriut dhe interesit publik.”

² Shih, po aty, nenin 5 “Detyrueshmëria e ndjekjes penale”, që parashikon: “Ushtrimi i ndjekjes penale është i detyrueshëm, me përjashtim të rasteve kur ligji parashikon ndryshe.”

³ Shih, po aty, nenin 6 “Pavarësia e prokurorëve”, që parashikon:

“1. Në ushtrimin e funksioneve të tyre, prokurorët kryejnë veprime, parashitje kërkese dhe marrin vendime në mënyrë të pavarur, bazuar në parimet e ligjshmërisë, objektivitetit dhe paanshmërisë.

2. Prokurorët u nënshtrohen udhëzimeve të përgjithshme me shkrim të prokurorit më të lartë, sipas dispozitave të këtij ligji.

3. Ligji garanton pavarësinë dhe autonominë e nevojshme për marrjen e vendimeve gjatë ushtrimit nga prokurorët të funksionit të tyre kushtetues e ligjor, pavarësisht ndikimit të paligjshëm të brendshëm apo të jashtëm nga çdo autoritet publik a privat.”

1. "Prokurori me juridiksion të përgjithshëm" janë prokuroritë pranë gjykatave të shkallës së parë dhe gjykatave të apelit me juridiksion të përgjithshëm dhe Prokuroria e Përgjithshme⁴.

2. "Prokuror" është magjistrati i emëruar prokuror sipas ligjit⁵ që ushtron funksionet në prokuroritë e të gjithë niveleve me juridiksion të përgjithshëm.

3. "Prokuror më i lartë" është⁶:

a. Prokurori i Përgjithshëm për prokurorët e Prokurorisë së Përgjithshme dhe për prokurorët e drejtuesit e prokurorive pranë gjykatave të apelit dhe gjykatave të shkallës së parë me juridiksion të përgjithshëm.

b. Drejtuesi i prokurorisë së apelit pranë gjykatave të apelit të juridiksionit të përgjithshëm për prokurorët që ushtrjnë funksionet pranë kësaj prokurorie.

c. Drejtuesi i prokurorisë pranë gjykatës së shkallës së parë të juridiksionit të përgjithshëm për prokurorët që ushtrjnë funksionet pranë kësaj prokurorie.

4. "Prokurori i Përgjithshëm" është drejtuesi i Prokurorisë së Përgjithshme dhe ka përgjegjësi për punën e Prokurorisë së Përgjithshme dhe të prokurorive pranë gjykatave të apelit dhe të shkallës së parë të juridiksionit të përgjithshëm, si dhe prokurori më i lartë për prokurorët në prokuroritë e të gjithë niveleve të këtij juridiksioni⁷.

5. "Drejtuesi i prokurorisë", është titullari/drejtuesi i çdo prokurorie pranë gjykatave të apelit ose të shkallës së parë të juridiksionit të përgjithshëm dhe prokurori më i lartë për prokurorët që ushtrjnë funksionet pranë prokurorisë që ai drejton⁸.

6. "Zëvendësdrejtuesi i prokurorisë" është një nga drejtuesit e seksioneve në prokuroritë ku janë krijuar seksione ose një nga prokurorët në prokuroritë ku nuk ka seksione, që plotëson kushtet e kriteret ligjore⁹ dhe emërohet nga drejtuesi i prokurorisë, pasi merr mendimin e mbledhjes së përgjithshme të prokurorëve, për një mandat 2 vjeçar, me të drejtë rizgjedhje.

7. "Seksionet në prokurori" janë njësi të strukturës në prokuroritë përkatëse me jo më pak se tre prokurorë, të cilat ngrihen nga drejtuesi i prokurorisë për kategori të caktuara veprash penale, kur është e mundur dhe e nevojshme.¹⁰

8. "Drejtuesi i seksionit" është prokurori i emëruar nga drejtuesi i prokurorisë ,nga radhët e seksionit, që ka të paktën 5 vjet përvojë dhe ka rezultate të mira në punë dhe aftësi organizative¹¹.

9. "Pavarësia e prokurorit" është pavarësia dhe autonomia e prokurorit për marrjen e vendimeve në kryerjen e hetimeve, ndjekjen penale, përfaqësimin në gjyq të një çështje dhe/ose akuze penale dhe urdhërimin ose mbikëqyrjen e ekzekutimit të vendimeve gjyqësore, pavarësisht ndikimit të paligjshëm të drejtpërdrejtë ose të tërthortë të brendshëm apo të jashtëm nga çdo autoritet publik a privat apo palë në procesin penal.¹²

⁴ Shih, po aty nenin 2 shkronja "d".

⁵ Shih, nenet 35, 37, 39 pika 3 e vijues të ligjit nr.96/2016 "Për statusin e gjyqtarëve e prokurorëve në Republikën e Shqipërisë".

⁶ Shih, nenin 2 shkronjat "c" paragrafët "i", "ii", "iii" të ligjit nr.97/2016.

⁷ Shih, nenin 2 shkronja "c" parag. "i" e "d", nenin 38 pika 1 e vijues të ligjit nr.97/2016.

⁸ Shih, nenin 2 shkronjat "b" dhe "c" parag. "ii, iii", nenin 42 e vijues të ligjit nr.97/2016.

⁹ Shih, nenin 44 të ligjit nr.97/2016 dhe urdhërin Nr.101 date 12.06.2019 "Për miratimin e Rregullores "Për emërimin e zëvendësdrejtuesit të prokurorisë në prokuroritë me juridiksion të përgjithshëm".

¹⁰ Shih, nenin 21, paragrafi 1 të ligjit nr.97/2016.

¹¹ Shih, po aty nenin 21, pika 2.

¹² Shih, nenin 148 pika 2 të Kushtetutës, nenin 6 të ligjit nr.97/2016 dhe Relacioni datë 27.06.2016 shoqëruar të projekligjit "Për organizimin dhe funksionimin e prokurorisë në Republikën e Shqipërisë" të Kuvendit të Shqipërisë dhe jurispondencën e GJEDNJ vendimet për çështjet: -Lešník v. Slovakia, nr. 54, 11 mars 2003; -Błaja Neës sp. Z o.o. v. Poland, nr. 60, 23 nëntor 2013; -Chernysheva v. Russia, 10 qershor 2004.

10. “Detyrueshmëria e ndjekjes penale” është detyrimi kushtetues dhe ligjor i prokurorit për ushtrimin e ndjekjes penale, përfaqësimin e akuzës në gjyq në emër të shtetit për çështjen që i ngarkohet dhe për ekzekutimin e vendimeve gjyqësore penale, si dhe detyrimi në çdo rast të zbatojë udhëzimet e përgjithshme të prokurorit më të lartë të nxjerra me qëllim unifikimin e qëndrimit të prokurorisë për problematika të caktuara.¹³

11. “Ligjshmëria e veprimtarisë” është detyrimi i prokurorit që në ushtrimin e funksioneve ose detyrës t’i nënshtrohet, Kushtetutës, akteve ndërkombëtare të ratifikuara me ligj dhe ligjislacionit të brendshëm në fuqi, duke respektuar parimet e procedimit të drejtë, të barabartë e të rregullt ligjor dhe mbrojtur liritë e të drejtat e interesat e ligjshme të shtetasve, si dhe interesin e shtetit dhe atë publik¹⁴ në procesin penal.

KREU II GARANTIMI I PAVARËSISË SË PROKURORIT

Neni 4

Pavarësia e prokurorit, detyrueshmëria e ndjekjes penale dhe respektimi i ligjshmërisë të veprimtarisë në prokurori

1. Prokurori ka pavarësi dhe autonomi në ushtrimin e funksioneve kushtetuese dhe ligjore për kryerjen e veprimeve procedurale, parashtrimin e kërkesave dhe marrjen e vendimeve në mënyrë të pavarur nga çdo ndikim i paligjshëm, i brendshëm apo i jashtëm, i çdo autoriteti publik apo privat, gjatë hetimeve paraprake, përfaqësimit të akuzës dhe/ose çështjes në gjykatë dhe ekzekutimit të vendimeve gjyqësore penale apo mbikëqyrjes të zbatimit tyre¹⁵.

2. Në ushtrimin e funksioneve në mënyrë të pavarur, prokurori duhet të bazohet në parimet e ligjshmërisë, objektivitetit dhe paanshmërisë, duke respektuar parimet e procedimit të drejtë, të barabartë e të rregullt ligjor dhe mbrojtur liritë e të drejtat dhe interesat e ligjshme të shtetasve, interesin e shtetit dhe atë publik në procesin penal.

3. Pavarësia procedurale nuk e shmang prokurorin nga detyrimi për të përmbushur funksionet dhe/ose përgjegjësitë kushtetuese e ligjore që ka, për të ushtruar ndjekje penale për çështjen që i ngarkohet dhe në çdo rast të ndjekë dhe zbatojë udhëzimet e përgjithshme të nxjerra nga prokurori më i lartë¹⁶, me qëllim unifikimin e qëndrimeve në veprimtarinë e prokurorisë për çështje të caktuara, përfshirë dhe zbatimin e rekomandimeve prioritare të Këshillit të Ministrave apo rezolutave të Kuvendit për luftën kundër kriminalitetit.

Neni 5

Ankimi kundër udhëzimit të përgjithshëm

¹³ Shih, nenin 148 pika 1 e Kushtetutes, nenin 5, 24 e vijues të ligjit nr.97/2016 dhe Relacionin e Kuvendit të Shqipërisë datë 27.06.2016 shoqërues të projekligjit “Për organizimin dhe funksionimin e prokurorisë në Republikën e Shqipërisë” dhe jurispondencën e GJEDNJ vendimet për çështjet: -Lešnik v. Slovakia, nr. 54, 11 mars 2003; -Błaja Neës sp. Z o.o. v. Poland, nr. 60, 23 nëntor 2013; -Çernysheva v. Russia, 10 qershor 2004.

¹⁴ Shih, nenin 4 të ligjit nr.97/2016 dhe nenin 1 e vijues të K.Pr.Pemale.

¹⁵ Shih, po aty nenin 25 pika 2 “Ushtrimi i funksioneve të prokurorit” dhe neni 6 pika 1 e vijues të ligjit nr.97/2016;

¹⁶ Shih, po aty nenin 6, -Relacionin datë 27.06.2016 shoqërues i projekligjit “Për organizimin dhe funksionimin e prokurorisë në Republikën e Shqipërisë” për në Kuvendin e Shqipërisë dhe -jurispondencën e GJEDNJ vendimet për çështjet: -Lešnik v. Slovakia, nr. 54, 11 mars 2003; -Błaja Neës sp. Z o.o. v. Poland, nr. 60, 23 nëntor 2013; -Çernysheva v. Russia, 10 qershor 2004.

1. Prokurorët më të lartë mund të nxjerrin udhëzime të përgjithshme të arsyetuara me shkrim të natyrës administrative ose procedurale të cilat janë të detyrueshme për prokurorët më të ulët¹⁷.

2. Prokurori, në rastet kur vlerëson se udhëzimi i përgjithshëm është i pabazuar në ligj, apo është haptazi në kundërshtim me ligjin, mund të bëjë ankim kundër udhëzimit në Këshillin e Lartë të Prokurorisë¹⁸, duke ndjekur procedurën si më poshtë:

a) Ankimi i prokurorit kundër udhëzimit të përgjithshëm duhet të paraqitet në Këshillin e Lartë të Prokurorisë brenda 30 ditëve¹⁹ nga data kur ankuesi ka marrë njoftim për nxjerrjen e udhëzimit.

3. Prokurori është i detyruar të zbatojë udhëzimin e përgjithshëm të ankimuar prej tij²⁰, me përjashtim të rasteve kur ai vlerëson se udhëzimi është haptazi në kundërshtim me ligjin.

5. Prokurori më i lartë, kërkon fillimin e verifikimeve nga sektori i monitorimit në Prokurorinë e Përgjithshme dhe/ose hetimin disiplinor ndaj prokurorit²¹ në rastet kur ai nuk zbaton udhëzimet e përgjithshme dhe vepron haptazi në kundërshtim me ligjin apo vepron me keqdashje apo pakujdesi të rëndë në veprimtarinë procedurale të tij.

6. Prokurori, kërkon fillimin e verifikimeve nga sektori i monitorimit në Prokurorinë e Përgjithshme në rastet kur drejtuesi i prokurorisë, zëvendësdrejtuesi apo drejtuesi i seksionit nuk zbaton udhëzimet e përgjithshme dhe vepron haptazi në kundërshtim me ligjin apo vepron me keqdashje apo pakujdesi të rëndë në veprimtarinë procedurale të tij.

Neni 6

Qëndrimi i prokurorit ndaj ndërhyrjes ose ushtrimit të ndikimit të paligjshëm

1. Prokurori në çdo rast që evidenton ndërhyrje ose ushtrim ndikimi, të papërshtatshëm, apo në kundërshtim me ligjin ndaj tij, nga brenda sistemit të prokurorisë, apo nga përfaqësues të pushtetit legjislativ, ekzekutiv, medias apo çdo personi tjetër juridik a fizik apo subjekt i procedimit penal, menjëherë refuzon çdo ndërhyrje ose ushtrim ndikimi të paligjshëm²², merr çdo masë për të qenë dhe të duket se është jashtë çdo ndikimi dhe ushtron funksionet në zbatim të kushtetutës dhe ligjit.

Neni 7

Qëndrueshmëria e organit të prokurorisë në raport me pavarësinë funksionale të prokurorit

1. Pavarësia funksionale e prokurorit në vendimmarrje për çështje konkrete, duhet të garantohet, duke ruajtur njëkohësisht qëndrueshmërinë e organit të prokurorisë dhe uniformitetin e veprimtarisë së tij, përmes nxjerrjes dhe zbatimit të udhëzimeve të përgjithshme nga Prokurori i Përgjithshëm dhe/ose drejtuesit e prokurorive, të cilët kujdesen për ushtrimin e kompetencave ligjore/kushtetuese në veprimtarinë e prokurorisë dhe kanë përgjegjësi ligjore për mbarëvajtjen e

¹⁷ Shih, nenet 38 pika 2 shkronja "b" e 46 të ligjit nr.97/2016.

¹⁸ Shih, po aty, nenin 47 pika 1;

¹⁹ Shih, nenin 132 "Afati i ankimit administrativ ndaj aktit administrativ" të ligjit nr.44/2015 Kodi i Procedurës administrative i Republikës së Shqipërisë", i cili në pikën 1 parashikon: "1. Ankimi administrativ ndaj aktit administrativ duhet të paraqitet brenda 30 ditëve nga data kur ankuesi ka marrë njoftim për nxjerrjen...aktit administrativ".

²⁰ Shih, nenin 47 pika 2 e ligjit nr.97/2016;

²¹ Shih, po aty, nenet 38 pika 2 shkronja "i" dhe 42 shkronja "dh" .

²² Shih, nenin 3 pika 3 të ligjit nr. 96/2016, "Për statusin e gjyqtarëve dhe prokurorëve në Republikën e Shqipërisë".

punës në prokurori, si dhe nxjerrin udhëzime jo të detyrueshme për çështje konkrete për prokurorët e prokurorive që drejtojnë.

2. Rregullat që disiplinojnë autoritetin e drejtuesve të prokurorisë si prokurorë më të lartë, në respekt të parimeve të ligjshmërisë dhe pavarësisë në ushtrimin e funksioneve të prokurorit, janë:

a) Respektimi i procedurës ligjore nga prokurori më i lartë për nxjerrjen e udhëzimeve të përgjithshme të detyrueshme me shkrim dhe të arsyetuar:

i) për të siguruar zbatimin e njëjtë të ligjit material penal e ligjit procedural penal në ushtrimin e ndjekjes penale, ngritjen dhe përfaqësimin e akuzës/çështjes në gjykim, ushtrimin e të drejtës së ankimit/rekursit nga prokurori dhe ekzekutimin e vendimeve gjyqësore penale, bazuar në vendime gjyqësore njësuere ose unifikuese të Kolegjit Penal dhe Kolegjeve të Bashkuara të Gjykatës së Lartë²³.

ii) për të siguruar zbatimin e rekomandimeve të Këshillit të Ministrave dhe rezolutave të Kuvendit të Shqipërisë për luftën kundër kriminalitetit²⁴, që përcaktojnë përparësitë për zbatimin e politikës penale dhe/ose mënyrat e ndjekjes së tyre.

iii) për përcaktimin e një tërësi kriteresh në zbatim të ligjit dhe unifikuar vendimmarrjen për çështje apo grup çështjesh ligjore të njëjta, që trajtohen ose kualifikohen ndryshe nga prokurorët në të njëjtën prokurori ose në prokurori të ndryshme me juridiksion të përgjithshëm.

b) Respektimi i procedurës ligjore nga drejtuesit e prokurorisë për nxjerrjen e udhëzimeve jo të detyrueshme për çështje konkrete për prokurorët në prokuroritë përkatëse, të cilët duhet që:

i) të jenë me shkrim dhe të arsyetuara dhe kur rrethanat nuk e lejojnë, të jepen verbalisht dhe, brenda një kohe të arsyeshme, të konfirmohen me shkrim.

ii) në rastet kur prokurori ka kërkuar shpjegime për udhëzimin jo të detyrueshëm, pasi nuk është dakord apo ka paqartësi në lidhje me të, drejtuesi i prokurorisë ose drejtuesi i seksionit përkatës të japë shpjegime mbi udhëzimet jo të detyrueshme dhe t'i përsërisë ato në të njëjtën mënyrë, ndryshe udhëzimi konsiderohet i tërhequr.

c) Respektimi i të drejtës që prokurori ka sipas ligjit për heqjen dorë nga çështja konkrete që ka në ndjekje dhe kryerja e procedurës për zëvendësimin e tij²⁵.

KREU III

MARRËDHËNIET NDËRMJET PROKURORIT DHE DREJTUESIT NË PROKURORI

Neni 8

Të drejtat dhe detyrimet e prokurorëve në ushtrimin e funksioneve në prokurori

1. Të drejtat dhe detyrimet e prokurorit në marrëdhëniet administrative me drejtuesit e prokurorisë janë:

a) Prokurori merr pjesë në çdo mbledhje të thirrur nga prokurori më i lartë²⁶ përveç rasteve të justifikuara sipas ligjit apo me akte normative përkatëse.

b) Prokurori zbaton kushtet dhe kriteret e përcaktuara sipas ligjit dhe/ose me udhëzim të përgjithshëm në pjesëmarrjen në short apo në marrjen e një dosje/çështje që i është caktuar.

²³ Shih, nenin 46 pika 3 shkronja "b" të ligjit nr.97/2016 dhe nenin 438 të K.Pr.Penale;

²⁴ Shih, po aty nenin 46 pika 3 shkronja "c" në lidhje me nenin 104 pika 2 shkronja "b";

²⁵ Shih, nenin 26 në lidhje me nenin 17 dhe nenin 27 të K.Pr.Penale dhe nenin 49 të ligjit nr.97/2016.

²⁶ Shih nenin 2 shkronja "c" të ligjit nr.97/2016.

c) Prokurori merr pjesë në çdo diskutim të natyrës profesionale të thirrur nga drejtuesi i prokurorisë dhe është pjesë konstruktive e këtyre diskutimeve.

ç) Prokurori duhet të respektojë orarin zyrtar dhe të gjitha detyrimet administrative të parashikuara në ligj dhe me aktet normative detyruese përkatëse.

d) Prokurori informon drejtuesin e prokurorisë për çdo veprimtari jashtë funksionit të miratuar nga Këshilli i Lartë i Prokurorisë sipas ligjit.

dh) Prokurori ndihmon organet administrative të prokurorisë kur i kërkohet brenda kompetencave dhe funksionit të tij.

2. Të drejtat dhe detyrimet e prokurorit në marrëdhëniet procedurale me drejtuesit e prokurorisë janë:

a) Prokurori udhëhiqet nga pavarësia e tij procedurale në kryerjen apo kontrollin e hetimeve, ushtrimin e ndjekjes penale, përfaqësimin e akuzës në gjyq në emër të shtetit, ushtrimin e të drejtës së ankimit, urdhërimin dhe/ose mbikëqyrjen e ekzekutimit të vendimeve penale apo kryerjen e detyrave të tjera të caktuara me ligj.²⁷

b) Prokurori në ushtrimin e funksioneve në mënyrë të pavarur ka detyrimin të respektojë Kushtetutën, kuadrin ligjor të veprimtarisë, udhëzimet e përgjithshme të Prokurorit të Përgjithshëm dhe/ose të drejtuesit të prokurorisë ku ai është emëruar apo ushtron funksionet²⁸.

c) Prokurori ka detyrimin të informojë drejtuesin e prokurorisë, sa herë që kërkohet prej këtij të fundit, lidhur me ecurinë e procedimeve/çështjeve të caktuara.

ç) Prokurori duhet të shmangë çfarëdo lloj ndikimi dhe sjellje të paligjshme e të papërshtatshme që cënon drejtësinë dhe imazhin e prokurorisë.²⁹

d) Çdo marrëdhënie që lidhet me çështjen apo funksionet e tij si prokuror duhet të ushtrohet prej tij në rrugë institucionale.

dh) Prokurori njofton drejtuesin e prokurorisë në rastet që konstaton se ka papajtueshmëri apo konflikt interesi të drejtëpërdrejtë ose të tërthortë me çështjen konkrete që ka në ndjekje apo në shqyrtim gjyqësor.³⁰

e) Prokurori duhet të marrë pjesë në grupet e përbashkëta hetimore ose në procedime të lidhura në zbatim të ligjit dhe/ose planifikimit të bërë nga drejtuesi i prokurorisë.³¹

Neni 9

Kompetencat dhe roli i drejtuesit në prokurori në marrëdhënie me prokurorët

1. Drejtuesi i prokurorisë në të gjithë nivelet e prokurorive me juridiksion të përgjithshëm është përgjegjës për krijimin e kushteve që bëjnë të mundur organizimin e punës, respektimin e ligjit, etikës dhe mirëfunksionimin e prokurorisë³² dhe për mbarëvajtjen e punës dhe sigurimin e efikasitetit, efincencës, ligjshmërisë dhe transparencës në veprimtarinë e prokurorisë³³ që drejton, sipas parashikimeve të ligjit nr.97/2016 “ Për organizimin dhe funksionimin e Prokurorisë në Republikën e Shqipërisë”.

²⁷ Shih, nenin 148 pika 1 të Kushtetutës dhe nenin 24 e vijues të K.Pr.Penale.

²⁸ Shih, po aty nenin 148/b pika 2 shkronja “b”, nenin 38 pika 2 shkronja “b” e 46 të ligjit nr.97/2016;

²⁹ Shih, nenin 3 të ligjit nr.96/2016.

³⁰ Shih, neni 51 të ligjit nr.97/2016 në lidhje me nenin 3 pikat 1,4 e nenet 4, 5 e vijues të ligjit nr.9367/2005 “Për parandalimin e konfliktit të interesit në ushtrimin e funksioneve.”

³¹ Shih, nenin 42 shkronja ç” të ligjit nr.97/2016 në lidhje me nenin 306 të K.Pr.Penale.

³² Shih po aty, shkronjën “a” të nenit 42.

³³ Shih, po aty nenin 52 .

Neni 10

Mënyra dhe procedura që ndiqet në nxjerrjen e udhëzimeve të përgjithshme dhe mbikëqyrja e zbatimit të tyre

1. Prokurori i Përgjithshëm si prokuror më i lartë³⁴ nxjerr udhëzime të përgjithshme të detyrueshme të natyrës administrative e procedurale penale dhe kujdeset për ushtrimin e kompetencave ligjore dhe kushtetuese të prokurorëve³⁵ në Prokurorinë e Përgjithshme dhe të prokurorëve në prokuroritë pranë gjykatave të apelit dhe pranë gjykatave të shkallës së parë me juridiksion të përgjithshëm.

2. Drejtuesit e prokurorive pranë gjykatave të apelit dhe pranë gjykatave të shkallës së parë garantojnë dhe lehtësojnë zbatimin e udhëzimeve të Prokurorit të Përgjithshëm³⁶, duke nxjerrë dhe udhëzime të përgjithshme, si dhe struktura përkatëse në Prokurorinë e Përgjithshme mbikëqyr zbatimin e tyre.

3. Drejtuesit e prokurorive, informojnë periodikisht Prokurorin e Përgjithshëm me të dhëna të sakta mbi gjendjen e kriminalitetit dhe/ose për ecurinë e veprimtarisë në prokuroritë që drejtojnë, si dhe përgatisin e dërgojnë raportin vjetor në formën dhe sipas treguesve të përcaktuar, raport i cili miratohet me urdhër të tij³⁷.

4. Prokurori i Përgjithshëm nxjerr udhëzime të përgjithshme, edhe për zbatimin e rekomandimeve prioritare të Këshillit të Ministrave³⁸ dhe rezolutave të Kuvendit të Shqipërisë.

a) Me zbatimin e tyre ngarkohen prokurorët dhe drejtuesit e prokurorive, të cilët raportojnë si kanë ndikuar ato mbi gjendjen e kriminalitetit dhe në veprimtarinë e prokurorisë në fushat e rekomanduara.

b) Për mbikëqyrjen e zbatimit tyre raportojnë si drejtuesit e prokurorive, ashtu dhe prokurorët dhe punonjësit e strukturave përkatëse në Prokurorinë e Përgjithshme, të cilët informojnë Prokurorin e Përgjithshëm dhe përgatisin projektin e informimit dhe/ose raportimit të tij përpara Kuvendit³⁹, bazuar në të dhënat e dërguara të sakta e të detajuara lidhur me efektivitetin e ndjekjes penale, cilësinë e përfaqësimit të akuzës në gjyq, si dhe me elemente apo tregues të tjerë thelbësorë në veprimtarinë e prokurorive të juridiksionit të përgjithshëm.

Neni 11

Mënyra dhe procedura që ndiqet në nxjerrjen e udhëzimeve jo të detyrueshme për prokurorët dhe mbikëqyrja e zbatimit të tyre

1. Udhëzime jo të detyrueshme për kryerjen e veprimeve procedurale përpara se të merret vendimi për mënyrën e përfundimit të procedimit/çështjes konkrete⁴⁰ mund të jepen/nxirren nga:

- a) Prokurori i Përgjithshëm për prokurorët e Prokurorisë së Përgjithshme;
- b) Drejtuesi i prokurorisë pranë gjykatës së apelit për prokurorët e prokurorisë që drejton;

³⁴ Shih nenin 2 shkronja "c" e ligjit nr. 97/2016.

³⁵ Shih po aty nenin 38 shkronja "f".

³⁶ Shih po aty nenin 42 shkronja "g" dhe nenin 43 shkronja "dh".

³⁷ Shih po aty nenin 50.

³⁸ Shih po aty nenin 46 pika 3 shkronja "c".

³⁹ Shih po aty nenin 104.

⁴⁰ Shih po aty, shkronja "ç" e neni 43 dhe piken 1 të neni 48.

c) Drejtuesi i prokurorisë pranë gjykatës të shkallës së parë për prokurorët e prokurorisë që drejton, ose;

ç) Drejtuesi i seksionit për prokurorët e caktuar në seksionin që ai drejton.

2. Udhëzimet mund të nxirren nga drejtuesi përkatës, në momentin e caktimit, të kallëzimit penal apo referimit të veprës penale dhe/ose të procedimit/çështjes për ndjekje prokurorit, ose gjatë procesit të verifikimit të ecurisë së procedimit/çështjes, kur drejtuesi e vlerëson të nevojshëm për mbarëvajtjen apo mënyrën e përfundimit të procedimit/çështjes⁴¹.

a) Udhëzimet duhet të jepen me shkrim dhe të arsyetuara.

b) Përjashtimisht, kur rrethanat nuk e lejojnë, udhëzimet mund të jepen verbalisht dhe brenda 48 orëve të konfirmohen me shkrim.

3. Në rastet, kur prokurori i udhëzuar nuk është dakord ose ka paqartësi lidhur me udhëzimet e dhëna, brenda 5 (pesë) ditëve ka të drejtë të kërkojë me shkrim shpjegime të mëtjshme për udhëzimet ose për pjesë të tyre.

a) Në këto raste, drejtuesi përkatës, brenda 5 (pesë) ditëve, është i detyruar të japë shpjegime mbi udhëzimet dhe t'i përsërisë ato në të njëjtën mënyrë, përndryshe udhëzimi konsiderohet i tërhequr⁴².

4. Në rastet kur prokurori, ndaj të cilit është përsëritur udhëzimi me shkrim, vendosë të mos e zbatojë udhëzimin e drejtuesit, ai duhet të njoftojë brenda 5 (pesë) ditëve me shkrim drejtuesin përkatës, duke arsyetuar shkaqet e moszbatimit të udhëzimit prej tij.

5. Udhëzimi me shkrim dhe përgjigjet e prokurorit i bashkëlidhen akteve të procedimit penal.

KREU IV MËNYRA E INFORMIMIT TË DREJTUESVE NË PROKURORI

Neni 12

Informimi i drejtuesve të prokurorisë nga prokurori

1. Zyra e regjistrimit në prokurori njofton drejtuesin për çdo vendim për regjistrimin e procedimit penal të marrë nga prokurorët.

2. Prokurori informon drejtuesin e prokurorisë, sipas kërkesës së tij⁴³, mbi ecurinë dhe problemet e veprimeve të para hetimore në rastet e ngjarjeve të ndodhura përgjatë kryerjes së gatishmërisë dhe/ose mbi ecurinë e procedimit penal, përpara përfundimit të tij.

3. Në rastet kur gjykata i kthen aktet prokurorit⁴⁴, prokurori, mbi kërkesën e drejtuesit, duhet të informojë drejtuesin e prokurorisë për shkaqet dhe ecurinë e mëtjshme të hetimit brenda 5 (pesë) ditëve nga kërkesa.

4. Zëvendësdrejtuesi i prokurorisë apo drejtuesi i seksionit, që janë të gatshëm sipas grafikut të gatishmërisë, duhet të njoftojë drejtuesin e prokurorisë për çdo kërkesë drejtuar gjykatës lidhur me arrestimet në flagrancë, ndalimet, masat e sigurimit personal dhe/ose pasuror, mjetet për kërkimin e provës, sigurimin e provës, për aktet drejtuar insitucioneve të vuajtjes së denimit me burgim, masat mjekësore apo shërbimeve policore, të cilat nënshkruhen nga zëvendësdrejtuesi i prokurorisë ose drejtuesi i seksionit, në mungesë të drejtuesit të prokurorisë.

⁴¹ Shih po aty, piken 3 të nenit 48 në lidhje me shkronjën “ç” të nenit 43.

⁴² Shih nenin 48 pika 5 të ligjit nr. 97/2016.

⁴³ Shih po aty nenin 43 pika 2.

⁴⁴ Shih po aty nenet 329 pika 3, 329/b pika 3, 332/ç, 332/2, 332/dh shkronja “ç”, 402 pika 4.

Neni 13

Informimi mbi masat e sigurimit personal dhe pasuror

1. Prokurorët, me qëllim që të mundësojnë drejtuesin për nxjerrjen e udhëzimeve jo të detyrueshme, në përputhje me parashikimet e nenit 48 të ligjit nr.97/2016, përveç rasteve kur urgjenca nuk e lejon, duhet të informojnë paraprakisht drejtuesin e prokurorisë, sipas organizimit të brendshëm në prokurori, për procedimin penal ku do të nxirren urdhra ndalimi ose do t'i drejtohen gjykatës kërkesa për caktimin e masave të sigurimit arrest në burg, arrest në shtëpi, kërkesa për aplikimin e sekuestrove preventive, konservative apo për hetimin pasuror ku do të kërkohet aplikimi i masave ndaj pasurisë në kuadër të ligjit nr.10192/2009.

2. Drejtuesi mund të nxjerrë udhëzime jo të detyrueshme brenda 1 (një) dite nga marrja e informacionit.

3. Drejtuesi i prokurorisë, për procedime penale ku janë vendosur masat e sigurimit të parashikuara nga nenet 237 dhe 238 të Kodit të Procedurës Penale, apo janë aplikuar sekuestroja preventive, konservative, apo për hetime pasurore ku janë aplikuar masa ndaj pasurisë në kuadër të ligjit nr.10192/2009, me qëllim nxjerrjen e udhëzimeve jo të detyrueshme, mundet që t'i kërkojë prokurorit në momentin e regjistrimit të procedimit penal, hetimit pasuror apo përgjatë hetimit penal apo pasuror, të informohet paraprakisht, por jo më vonë se 1 (një) muaj përpara përfundimit të afateve të paraburgimit, të sekuestros, apo masave ndaj pasurisë në kuadër të ligjit nr.10192/2019, për gjendjen e procedimit penal apo hetimit pasuror. Informacioni bëhet me shkrim dhe duhet të përmbajë:

a) Veprimet hetimore të kryera, provat e administruara, gjendjen e procedimit penal apo hetimit e gjykimit pasuror, pyetjen e të pandehurit ose të personit nën hetim dhe personave të tjerë, përshkrimin e të dhënave të marra si dhe veprimet hetimore që priten të kryhen.

4. Drejtuesi mund të nxjerrë udhëzime jo të detyrueshme brenda 3 (tre) ditëve nga marrja e informacionit.

Neni 14

Informimi për ecurinë e ushtrimit të ndjekjes penale dhe hetimit pasuror

1. Prokurorët informojnë drejtuesin e prokurorisë për ecurinë e procedimit penal apo hetimit pasuror jo më vonë se 20 ditë përpara se të vendosin përfundimin e hetimeve, shpalljen e moskompetencës lëndore apo tokësore në një procedim penal apo të kërkojnë konfiskimin ose vendosin pushimin në çdo hetim pasuror, në të cilin drejtuesi i prokurorisë ka nxjerrë udhëzime jo të detyrueshme ose u është kërkuar sa më sipër nga ky i fundit në momentin e regjistrimit të procedimit penal apo hetimit pasuror për shkak të rëndësisë së tij.

2. Informacioni bëhet me shkrim dhe duhet të përmbajë veprimet hetimore të kryera, provat e administruara, të dhëna për personat nën hetim dhe veprat penale që hetohen, masat ndaj pasurisë dhe çështje të tjera me rëndësi.

3. Drejtuesi i prokurorisë mund të nxjerrë udhëzime jo të detyrueshme jo më vonë se 3 (tre) ditë nga marrja e informacionit.

Neni 15

Informimi për përfaqësimin e akuzës në gjyq

1. Në rastet kur gjykata nuk ka pranuar kërkesat e prokurorit lidhur me deklarin e fajësisë, cilësimin juridik të veprës, llojin e dënimit dhe konfiskimin në bazë të nenit 36 të Kodit Penal ose ligjit 10192/2009, prokurori brenda 3 (tre) ditëve nga dhënia e vendimit informon drejtuesin e prokurorisë për vendimin dhe faktin nëse do të ushtrojë apelim.

2. Prokurori që ka ushtruar apelim kundër vendimit të gjykatës⁴⁵, në rastet kur pas shqyrtimit gjyqësor janë zbuluar prova ose rrethanat e reja që i shërbejnë rigjyqimit të çështjes së ankimuar, duhet të njoftojë drejtuesin e prokurorisë ku ushtron funksionin dhe sipas rastit përgatit shtesë ankimin, si dhe njofton prokurorin dhe/ose drejtuesin e prokurorisë pranë gjykatës që shqyrton ankimin.

Neni 16

Delegimi i kompetencave dhe informimi i zëvendësdrejtuesit në prokurori

1. Drejtuesi i prokurorisë njofton paraprakisht Prokurorin e Përgjithshëm për periudhën kohore të delegimit të kompetencave të tij zëvendësdrejtuesit, duke vënë në dijeni dhe prokurorët në atë prokurori.

2. Në mungesë të drejtuesit të prokurorisë, prokurori është i detyruar t'i përgjigjet kërkesave të zëvendësdrejtuesit të parashikuara në nenet 12, 13, 14 dhe 15 të këtij udhëzimi të përgjithshëm.

Neni 17

Informimi i drejtuesit të seksionit

1. Prokurori informon drejtuesin e seksionit⁴⁶ brenda kompetencave që i janë caktuar nga drejtuesi i prokurorisë, në përputhje me parashikimet e këtij udhëzimi, në rastet kur i janë deleguar kompetencat për informimin nga ky i fundit.

2. Prokurori merr pjesë dhe kontribon në çdo mbledhje apo analizë të veprimtarisë së seksionit.

3. Prokurori ka të drejtë të ankohet tek drejtuesi i prokurorisë në çdo rast që kërkesën apo veprimin e drejtuesit të seksionit e çmon si tejkalim kompetencash. Drejtuesi i prokurorisë vendos për zgjidhjen e mosmarrveshjes si dhe njofton prokurorin dhe drejtuesin e seksionit.

Neni 18

Informimi për përfaqësimin e çështjes në gjykatën e apelit

⁴⁵ Koment: Arsyet dhe shkaqet e shtesës se apelimit kundër vendimit gjyqësor mund të jenë, si në gjykimin e themelit rastet kur i pandehuri për mungesë provash: -është deklaruar i pafajshëm (p.sh. për mungesë të një prove të kerkuar autoriteteve gjyqësore të huaja apo të provave të reja që kanë dal pas shqyrtimit gjyqësor ne shkallë të parë, etj) ose -i është ndryshuar cilësimi juridik i veprës penale (p.sh. për mungesë të një vendimi gjyqësor të formës së prerë që provon se bashkëipandehuri në një procedim të lidhur është deklaruar fajtor dhe dënuar për kryerjen e të njëjtës vepër penale në rrethana të cilësuar, etj) apo -i është caktuar një lloj a masë dënimi më e butë (p.sh.për mungesë të dëshmisë së penaltetit që provon se është dënuar pas dhënies së një dënimi për një krim të kryer më parë, rrethanë rënduese sipas nenit 50 shkronja "ç" K.Penal, etj), ashtu dhe në gjykimin e masave të sigurimit në rastet kur ka progres në rritje ose në ulje të kushteve dhe kritereve ligjore lidhur me masat e sigurimit të ankimuara, sipas përcaktimeve në nenin 246 pika 6 dhe vendimin unifikues nr.1/2009 te Kolegjeve te Bashkuara të Gjykatës së Lartë.

⁴⁶ Shih, nenin 12 pika 2 të ligjit nr. 97/2016.

1. Prokurori i apelit që përfaqëson çështjen ose akuzën mbi ankim në gjykatën e apelit ndaj të pandehurit me masë sigurimi “arrest në burg”, duhet të informojë drejtuesin e prokurorisë jo më vonë se 10 (dhjetë) ditë përpara përfundimit të afatit të paraburgimit të tij.

a) Informimi bëhet me shkrim, dhe duhet të përmbajë gjendjen e gjykimit, provat e administruara dhe nëse ka, shkaqet e zvarritjes së procesit gjyqësor.

2. Në rastet kur gjykata e apelit nuk ka pranuar kërkesat e prokurorit të apelit lidhur me fajësinë, cilësimin juridik të veprës, llojin dhe/ose masën e dënimit, prokurori jo më vonë se brenda 5 (pesë) ditëve informon drejtuesin e prokurorisë të apelit nëse do të ushtrojë rekurs kundër vendimit të gjykatës së apelit.

3. Prokurori i apelit që ka ushtuar rekurs kundër vendimit të gjykatës, në rastet kur pas shqyrtimit gjyqësor ka marrë dijeni kryesisht ose nga prokurori i çështjes për rrethana të reja që i shërbejnë rigjykimit të çështjes të rekursuar, duhet të njoftojë drejtuesin e prokurorisë së apelit dhe sipas rastit mund të përgatit shtesë rekursi, si dhe njofton prokurorin dhe/ose drejtuesin e prokurorisë pranë Gjykatës së Lartë.

Neni 19

Informimi për përfaqësimin e çështjes në Gjykatën e Lartë ose në Gjykatën Kushtetuese

Prokurori në Prokurorinë e Përgjithshme që përfaqëson akuzën dhe/ose çështjen mbi rekurs në Kolegjin Penal të Gjykatës së Lartë apo që përfaqëson Prokurorinë e Përgjithshme në gjykimin e çështjes në Kolegjet e Bashkuara të Gjykatës së Lartë ose në Gjykatën Kushtetuese me autorizim të Prokurorit të Përgjithshëm, informon për secilën çështje dhe në vazhdimësi Prokurorin e Përgjithshëm, për natyrën dhe problematikën e çështjeve që shqyrtohen në Gjykatën e Lartë ose Gjykatën Kushtetuese dhe për shkeljet e ligjit penal dhe/ose ligjit procedural penal në ngritjen dhe përfaqësimin e akuzës në gjyq të evidentuara në përfaqësimin e çështjeve nga prokurorët e prokurorive të shkallës së parë dhe të prokurorive të apeleve me juridiksion të përgjithshëm.

Neni 20

Qarkullimi i shkresave, akteve dhe materialeve hetimore

1. Për të garantuar transparencën e marrëdhënieve dhe respektimin e të drejtave dhe detyrimeve që lindin nga ligji nr.97/2016 dhe udhëzimet e nxjerra në zbatim të tij, qarkullimi i shkresave, akteve dhe materialeve hetimore mes drejtuesve dhe prokurorëve në prokuroritë e rrethave gjyqësore dhe apelit të parashikuara në pikën 2 të këtij neni, do të kryhet përmes protokollimit në regjistrin e komunikimeve të brendshme, sipas modelit Lidhja Nr.1 bashkëlidhur, në zbatim të këtij udhëzimi.

2. Në regjistër do të pasqyrohen të gjitha komunikimet e brendshme mes drejtuesve dhe prokurorëve, që lidhen me sa vijon:

a) kërkesën për informacion nga drejtuesi apo personi i deleguar në rastet e parashikuara nga ky udhëzim,

b) dhënien e informacionit nga prokurori në rastet e parashikuara nga ky udhëzim,

c) nxjerrjen e udhëzimeve jo të detyrueshme, përsëritjen e tyre me shpjegimet, nga drejtuesi i prokurorisë ose i seksionit,

d) kërkesën e prokurorit për shpjegime të mëtejshme nga drejtuesi i prokurorisë ose drejtuesi i seksionit,

dh) refuzimin e ndjekjes së udhëzimeve të drejtuesit të prokurorisë ose seksionit nga prokurori,

e) kalimin për firmë tek drejtuesit të shkresave dhe akteve apo materialeve bashkëlidhur që i drejtohen gjykatës, për kërkesat që lidhen me masat e sigurimit, përgjimet, sekuestron preventive, konservative, sekuestron dhe konfiskimin në bazë të ligjit nr.10192/2009, pushimin e procedimit penal, dërgimin për gjykim, vënien në ekzekutim të vendimeve penale,

ë) kalimin për firmë tek drejtuesit të shkresave apo akteve dhe materialeve bashkëlidhur që lidhen me pezullimin e procedimit penal, shpalljen e moskompetencës lëndore ose tokësore, njoftimet e palëve dhe viktimës për mosfillimin e procedimit penal,

f) kalimin tek prokurori të shkresave të firmosura nga drejtuesi, të parashikuara në gërmat “e” dhe “ë” të nenit 20 të këtij udhëzimi.

3. Prokurori ka detyrimin që çdo shkresë që do ia përcjellë për firmë drejtuesit si dhe aktet apo materialin hetimor bashkëlidhur, ta dorëzojë kundrejt firmës tek nëpunësi që mban regjistrin e komunikimeve të brendshme.

4. Nëpunësi i regjistrin, pasi protokollon në regjistër shkresën dhe materialin bashkëlidhur, ja kalon menjëherë drejtuesit të prokurorisë kundrejt firmës.

5. Drejtuesi i prokurorisë duhet të firmosë çdo shkresë përcjellëse që lidhet me materialet kallëzuese, procedimet penale, verifikimet pasurore dhe procedimet pasurore jo më vonë se 48 orë nga protokollimi i saj në regjistrin e komunikimeve të brendshme dhe ja dorëzon nëpunësit të regjistrin kundrejt firmës.

6. Çdo akt apo material hetimor që i bashkëlidhet shkresës protokollohet së bashku më shkresën dhe qarkullon i pashkëputur nga ajo.

7. Nëpunësi i regjistrin pasi protokollon në regjistër dorëzimin nga drejtuesi i prokurorisë të shkresës dhe akteve apo materialeve bashkëlidhur, ia kalon ato menjëherë kundrejt firmës prokurorit.

8. Nëpunësi i regjistrin të komunikimeve të brendshme në prokurori mban përgjegjësi për rregullshmërinë mbajtjes së këtij regjistri.

9. Të paktën 1 (një) herë në vit, rregullshmëria e mbajtjes së këtij regjistri kontrollohet nga sektori i monitorimit në Prokurorinë e Përgjithshme.

KREU V

PËRGJEGJËSIA DISIPLINORE, ZBATIMI, HYRJA NË FUQI DHE PUBLIKIMI

Neni 21

Shkeljet dhe përgjegjësia disiplinore

1. Shkelja e dispozitave ligjore referuese në këtë udhëzim të përgjithshëm dhe/ose moszbatimi i normimeve të përcaktuara në këtë udhëzim, kur nuk përbëjnë vepër penale, përbëjnë shkelje disiplinore sipas ligjit⁴⁷ dhe shkak për nisjen e verifikimeve nga sektori i monitorimit në Prokurorinë e Përgjithshme dhe/ose hetimit disiplinor ndaj prokurorit dhe/ose drejtuesit në prokuroritë me juridiksion të përgjithshëm.

47 Shih, nenin 148/d paragrafi 1 i Kushtetutës dhe nenet 101 pika 1 shkronja “a” “b” dhe 102 pika 1 shkronjat “c” “ç”, “d” “dh”, “e”, “g”, “i”, “j”, “nj”; pika 2 shkronjat “a”, “b”, “c”, “ç”, “d”, “dh” të ligjit nr.96/2016, i ndryshuar me ligjin nr.48/2019.

Neni 22 **Zbatimi dhe mbikëqyrja**

1. Ky udhëzim i përgjithshëm është i detyrueshëm për zbatim nga prokurorët dhe drejtuesit e prokurorive, si dhe nëpunësit dhe drejtuesit e administratës, të të gjithë niveleve të juridiksionit të përgjithshëm⁴⁸.

2. Me mbikëqyrjen e zbatimit të këtij udhëzimi ngarkohen drejtuesit e prokurorive të juridiksionit të përgjithshëm⁴⁹ dhe prokurorët e drejtuesit në strukturat përkatëse në Prokurorinë e Përgjithshme.

3. Drejtuesit e prokurorive mund të nxjerrin udhëzime të përgjithshme për lehtësimin e zbatimit të këtij udhëzimi të përgjithshëm⁵⁰.

4. Drejtuesit e prokurorisë dhe prokurorët, informojnë për çdo rast të moszbatimit të këtij udhëzimi sektorin e monitorimit në Prokurorinë e Përgjithshme.

5. Sektori i monitorimit në Prokurorinë e Përgjithshme përveç kontroleve periodike të parashikuara në nenin 20, pika 9, kryen verifikime për çdo rast kur ka të dhëna për shkeljen e dispozitave të këtij udhëzimi.

6. Për kryerjen e verifikimeve sektori i monitorimit në Prokurorinë e Përgjithshme kërkon informacion ose akte nga drejtuesit e prokurorisë apo prokurorët, të cilët duhet t'ia vënë dispozicion brenda 10 ditëve nga marrja e dëgjimit për kërkesën. Në funksion të kryerjes së verifikimeve, prokurorët e këtij sektori mund të kryejnë verifikime në regjistrin e komunikimeve të brendshme të parashikuar në këtë udhëzim apo në regjistra të tjerë kur është e nevojshme.

Neni 23 **Shfuqizime**

Udhëzimi i përgjithshëm nr.8, datë 4.12.2019, "Për garantimin e pavarësisë së prokurorit, marrëdhëniet ndërmjet tij me drejtuesit e prokurorisë dhe informimin në prokuroritë me juridiksion të përgjithshëm", shfuqizohet.

Neni 24 **Hyrja në fuqi dhe publikimi**

Ky udhëzim i përgjithshëm hyn në fuqi në datën 7.09.2020 dhe të publikohet në faqen e internetit të Prokurorisë së Përgjithshme.

PROKUROR I PËRGJITHSHËM



⁴⁸ Shih nenin 46 pika 1 dhe nenin 6 pika 2 të ligjit nr.97/2016

⁴⁹ Shih po aty nenin 43 shkronja "dh".

⁵⁰ Shih po aty nenet 46 pika 4.